

SEGMEDINA SRNA BAJRAMOVIĆ

Zastupnica u Skupštini Kantona Sarajevo

Sarajevo, 03.07.2020. godine

KANTON SARAJEVO

SKUPŠTINA KANTONA SARAJEVO

N/r Mirza Čelik, Predsjedavajući Skupštine Kantona Sarajevo

VLADA KANTONA SARAJEVO

N/r Mario Nenadić, Premijer KS

MINISTARSTVO ZA OBRAZOVANJE, NAUKU I MLADE

N/r Anis Krivić, Ministar

Predmet: Inicijativa za produženje roka za završetak studija po predbolonjskom sistemu – izmjena i dopuna člana 180. stav 16. Zakona o visokom obrazovanju („Službene novine Kantona Sarajevo“ 33/17)

Poštovani,

Na osnovu zahtjeva predstavnika studenata Medicinskog, Stomatološkog, Farmaceutskog, Veterinarskog i Fakulteta zdravstvenih studija Univerziteta u Sarajevu, kao ovlašteni podnosilac prema Poslovniku Skupštine KS podnosim Vam **inicijativu za izmjenu člana 180. stav 16. Zakona o visokom obrazovanju KS (u daljem tekstu Zakon)**, a kojim je definisan rok za završetak studija po predbolonjskom sistemu zaključno sa 30. 9. 2020. godine.

S obzirom da definisani rok uskoro ističe, a da imam informacije kako se u okviru nadležnih organa KS provode određene aktivnosti u cilju izmjene Zakona o visokom obrazovanju KS, te da na Univerzitetu u Sarajevu studira veliki broj studenata koji u navedenom roku objektivno neće biti u mogućnosti da okončaju započeti studij, molim Vas da prilikom navedenih izmjena poduzmete potrebne aktivnosti, koje bi u konačnici rezultirale izmjenama člana 180. stav 16. Zakona, i to na način da se rok dodatno produži.

Predlažem da nakon izmjena i dopuna člana 180. stav 16. Zakona glasi:

„Student koji je započeo studij po predbolonjskom sistemu studija ima pravo, u skladu sa zakonom, isti okončati do 30. 9. 2025. godine“

ili da se u članu 180. Zakona doda novi stav, 16a koji glasi:

„Student programa medicinske grupe nauka koji je započeo studij po predbolonjskom sistemu studija ima pravo, u skladu sa zakonom, isti okončati do 30. 9. 2025. godine“

Činjenica je da na Univerzitetu u Sarajevu postoji oko 2000 hiljada studenata koji imaju opravdan interes da se izvrše gore predložene izmjene Zakona, a kojima se prema važećim odredbama Zakona, protekom definisanog roka (do 30. 9. 2020. godine) suštinski oduzima pravo da svoje obrazovanje okončaju u skladu sa ranijim nastavnim planom i programom (u daljem tekstu Stari plan i program) prema kojem su započeli studij.

Većina ih radi i uporedo studira i na taj način finansira školovanje. U ukupnoj strukturi zainteresovanih studenata, određen broj studenata ima status apsoluta; određenom broju studenata je ostao samo diplomski, a neki još uvijek redovno pohađaju predavanja.

Pored prethodno prezentiranih razloga, dodatni argumenti koji idu u prilog inicijativi su:

1. Programska razlika između Starog i Bolonjskog programa povlači za sobom polaganje „diferencijalnih ispita“, koje je većina studenata i položila.
2. U slučaju da se citirana zakonska odredba ne izmijeni, sasvim je sigurno da će direktna posljedica navedenog biti vraćanje studenata na niže godine studija, što je sa aspekta gubitka vremena, ali i troškova studija pogrešno. Realne su situacije u kojima bi studenti Starog nastavnog plana i programa, čak i oni sa apsolutentskim statusom, bili vraćeni na 2 ili 3 godinu Bolonjskog sistema, što produžava studiranje za dodatnih 4-5 godina, što ni jednoj strani nije u interesu.
3. Nepostojanje ni najmanje naznake modela organizacije prelaska na nove studijske programe. To bi neminovno dovelo do haotičnog stanja na samim fakultetima, improvizacijama i zloupotrebama studenata, a sve bez mogućnosti i ponuđenog konkretnog zakonskog rješenja kojim se predmetna situacija reguliše. Smatram bitnim napomenuti i ne manje važan problem dodatnih troškova bodovanja, utvrđivanja ekvivalencije itd, koji će ponovo pasti na leđa studenata.
4. Specifičnost statusa studenata Starog plana i programa Medicinskog fakulteta Univerziteta u Sarajevu - Naime, vremensko ograničenje dato zakonom iz 2017. god. prema čl.180, da studenti koji studiraju po Starom planu i programu, mogu isti završiti do 30. 9. 2020. god, ne daje dovoljno vremena za redovan završetak studija, jer ima studenata koji su na 3. godini. To znači, da će 2020. godine završiti 3. godinu studija i trebati upisati 4. (četvrtu) redovno, što neće biti moguće jer će izgubiti pravo. Identičan je problem i sa studentima 4. ili 5-te godine, koji će trebati redovno upisati 5. ili 6. godinu studija prema Starom nastavnom planu i programu.
5. Svakako smatram da je predmetno pitanje i u domenu opšteg interesa društva u cjelini. Ne treba zaboraviti činjenicu da su medicinska zanimanja svakako deficitarna, te nije u opštem interesu države da se odrekne hiljada akademskih građana koji su ostali u svojoj zemlji, i koji žele da privedu studije kraju i koji državu ništa ne koštaju, već joj samo doprinose i finansijski i akademski. U ovo vrijeme dok hiljade mladih odlazi iz zemlje, navedeni studenti samo žele da ovdje završe fakultete i ostanu u zemlji gdje bi zasnovali porodice i u kojoj žele da još više doprinesu stečenim obrazovanjem.

6. Također, želim da ukažem kako je u susjednim zemljama, na osnovu sličnih ili identičnih argumenata, u Crnoj Gori i Republici Srbiji, još početkom ove školske godine produžen rok za završetak studija do 30. 9. 2022. god.

Uzimajući u obzir prethodno navedenu opravdanu argumentaciju, molim Vas da navedenu inicijativu podržite, te da je zajednički efikasno provedemo u djelo izmjenama konkretnog zakona u interesu studenata prije svega, ali i obrazovne perspektive društva uvažavajući deficitarnost predmetnih zanimanja.

S poštovanjem,

Segmedina Srna Bajramović